

畿

輔

安

瀾

志

畿輔安瀾志

王履泰恭纂

桑乾河卷下

附載

灰泉在西寧縣西北出灰泉山下流爲橋梁水南流
逕黃羊陂入許河

謹案灰泉壘在縣西北卽微泉也在西城兩鎮三
關志作在順聖東城誤

帶子泉在西寧縣東源出七馬房南流逕六馬房高辛莊至西水池又南流入於桑乾河今湮

聖泉一名西沙河在西寧縣順聖東城源出東北大王山頂清虛觀南流逕鰲魚口又南流逕順聖城西屈逕其城南黑龍灣水注之又南流逕舍人莊東南流入於桑乾河今湮

西寧縣志大王山在城東北十里巔有清虛上觀中觀下觀觀之巔有聖泉泉從巔下霖雨不溢亢

旱不涸 宣化府志 鰲魚口在東城西北十里鰲
魚山 畿輔通志 龍王堂河在東城東一里泉水
湧出南流入桑乾河 西寧縣志 黑龍灣在東城
東南二十里

溫泉古湯泉也在西寧縣東南榆林山下

畿輔通志 溫泉在順聖東城東二里 西寧縣志

榆林山在城東三十里溫泉在城東八里去順聖

廢縣城東二里

白家泉在西寧縣西城西南今無水

溜雲山泉在西寧縣西南名滴水岩

玉靈池在西寧縣東城南三十里

九女池在西寧縣東城東北三十里

八角井在西寧縣東城東八里三馬房

香爐溝在西寧縣西南三十里出藁木諸香

牛房溝五岔溝俱在西城

謹案西寧縣志西城屬尚有響水溝狼洞溝棘針

溝東城溝浮頭溝大蟒溝東西沙溝上下沙溝洞
口溝

連水

水經注祁夷水又東北連水入焉水出雒稽縣東
謹案雒稽漢置在蔚州東連水黃省曾本作逆水
或疑卽蓮花池又卽青牛淵道元所謂淵多蓮藕
者也第酈注明云祁夷水東北逕青牛淵水自淵
東注之祁夷水又北連水入焉則連水自另是一

水殆不可考矣

谷水

永經注祁夷水又東北谷水注之水出昌平縣故城南

謹案一統志昌平故城在蔚州北其地則未知所在矣

石山水

永經注濕水又東北逕石山水口水出南山北流

逕空侯城東魏土地記代城東北九十里有空侯城者也

謹案此水似卽下涿鹿縣水之口後人以礮石山名之者也道元所紀前畧後詳然指爲涑水所受之冰則非矣辨見下

桃花渠在蔚州東北桃花堡北乾隆三年開下流入桑乾河

二統志桃花堡在蔚縣東北九十里

謹案此爲太平河東分之一支今有乾沙河形跡
故道存焉乾隆三年蔚縣知縣王育楨因建渠二
十五丈闊五丈深三尺又築護隄城以防水

龍泉一在蔚州城東南高家莊一在城東李家碾今
名龍泉堡一在東白樂站堡

謹案白樂站龍泉有二源迤北又有一泉會流入
於會子河又西有添照町泉柳子泉西合泉三泉
合流逕鳳凰臺南又西南入於壺流河又西橫澗

泉水北流入於壺流河又西八里大德莊亦有泉入於壺流河志竝不載

聖水泉在蔚州城北聖水泉堡泉出山頭不溢不竭甘泉在太白山下

玉泉在蔚州南二十里泉出玉泉山

甘露泉在蔚州東南小五臺山西臺上冷泉暖泉二泉相比出蔚州東南湯峪其水南流入易州界

謹案蔚州志補東路有大泉陂南路有水泉兒西

水泉西路有大小飲馬泉蔚縣志鴛鴦站有北水泉敦信里有南水泉皆不見於他記載并錄於此
代王魚池在蔚州西南

石井在蔚州城南三里

雙井在蔚州城北雙井堡

白石溝在蔚州城東南五十里

白草溝在蔚州直峪口

謹案宣化府志蔚州有神通溝蔚州志補東路鹽

子溝天津溝黑溝兒裏八岔溝茨黎溝黃崖灌醬
磁溝南路藍池溝西草溝下千溝南賈皮溝兌舊
溝橙槽溝郝家溝井兒溝東西寨溝王溝裏大小
寺兒溝明窑溝北路磁窑溝黃家溝蔚縣志尚義
里趙家溝

木瓜澗

謹案宣化府志在蔚州西寧縣志有中西二木瓜
澗卽是也

蘆子澗在蔚州城東四十里

謹案蔚州志西路水澗子乾澗栲任家澗北路陳家澗南北撇土澗宿雅泉沙澗董家澗下淺澗蔚縣志永志里北雙澗感孝里天河澗懷忠里岔澗雅澗

潘泉協陽關水

水經注協陽關水出協溪東北歷斧頭山又北逕潘縣故城左會潘泉其泉從廣十數步東出城注

協陽關水雨盛則通注陽旱則不流惟泝泉而已
關水又東北流於濕水

謹案潘泉一統志以爲卽媯水今湮道元所記潘
泉與括地志媯水之文相應故一統志取之畿輔
通志以協陽關爲在保安州西而水則無聞焉蓋
在當日已有陽旱不流之說宜其湮廢久矣

溫泉

水經注濕水又東溫泉水注之水上承溫泉於橋

山下 保安州志溫泉在保安州東南四十里今

涸

紅水泉在保安州東南二十里今涸

冷暖泉在老君堂之西有溫泉泉南不數武有冷泉

遼史地理志奉聖州有溫泉 畿輔通志保安州

東三十里有溫泉

丁零川寶峰川

謹案方輿紀要安寨城在保安州西宋白曰幽州

丁零川西南有安寨軍川已無考寶峰川鎮在保
安州東南通宣府要路三十八盤分水嶺蕎麥川
三者是也川在衆山之中括地志所謂阪泉至涿
鹿東涿水合卽是此水今已枯絕

楊莊泉在保安州西南五十里尤家關山神廟下與
岔道泉同時湧出

隆福泉在保安州東北十五里流爲清水河

保寧山泉在保安州西北六十里舊名白帖山

懸空洞泉在保安州南六十里地名元陀村

火神淀在保安州西今湮

七旂里泉黑龍池泉龍王塘泉水頭寺津在懷來保安州界或曰卽礮山水也諸泉合注礮山堡西北隅東南迤邐葉元莊又東南迤邐寺兒灣又東南迤邐頭堡子二堡丁又東南迤邐李家營洪家營又東南迤邐桑園營又東南迤邐新窩子又東南至河神廟南經縉山下入於桑乾

畿輔通志礮山堡西南有七旂里泉卽阪泉也東
北流合黑龍池水頭寺津及龍王池諸水又東環
堡城北又東南入縉山河 懷來縣志七旂里泉
在礮山堡西南十里水頭寺津在堡西南四里龍
王堂泉在堡南三里泉水湧出至堡西北與水頭
寺津黑龍池七旂里泉合繞南流入縉山河黑龍
池在津西七里

謹案畿輔通志以七旂里泉合諸水共四水懷來

縣志則以龍王塘泉合諸水亦四水通志以七旂
里泉爲阪泉保安州志則云龍湫名阪泉一名黃
帝泉在保堡堡今涸龍王堂池卽蚩尤泉也豈七
旂里泉亦名龍湫抑別有一龍湫爲阪泉歟通志
龍池在懷來礮山北二里水自地湧出澄清可鑿
澹而爲池合之懷來縣志泉水湧出之文似卽是
龍王堂泉第南北異說或一以堡言一以山言也
若龍湫之與龍王堂池則一以爲黃帝一以爲蚩

尤斷不可混也考水經注阪泉又東北與蚩尤泉
會此以阪泉會蚩尤泉與通志以七旂里泉合諸
水之文合又云水出蚩尤城泉淵而不流霖雨併
則流注阪泉此以蚩尤泉注阪泉與懷來縣志以
龍王塘泉會諸水之文合第水經注云阪泉上有
黃帝祠不曰黃帝泉括地志則云阪泉今名黃帝
泉是黃帝泉因黃帝祠而訛也水經注云涿水出
涿鹿山世謂之張公泉其水又東北與阪泉合括

地志則云阪泉在懷戎縣東五十里出涿鹿山東
北與涿水合阪泉合涿水涿水合阪泉卽彼此可
以互言然同出一山俱東北合則不應太無別也
又水經注以蚩尤泉爲淵而不流寰宇記則云黃
帝祠有泉湛而不流卽古阪泉也又似誤以蚩尤
泉爲阪泉也又明統志云涿鹿山一名獸鹿山涿
水出焉方輿紀要同又統志順天府有獨鹿山在
涿城西十五里不言出涿水而於涿水則云源自

上谷涿鹿山流至涿州北入挾河後之作志遂以涿州爲涿鹿而以涿州之獨鹿山爲涿鹿山而涿水竟在涿州矣涿鹿定屬今之保安斷非涿州據志以七旂里泉爲阪泉龍王堂泉爲蚩尤泉雖不可盡信然礬山在保安州東南與州西南境諸山泉皆越在桑乾洋河二水之南而漢上谷郡之潘縣北齊之懷戎縣皆在其地至涿水據前漢書地理志出涿郡涿縣應劭曰出上谷涿鹿縣水經注

聖水篇云余按涿水自涿鹿東注濕水濕水東南
逕廣陽郡與涿郡分水涿之爲名當受涿水通稱
矣但物理潛通所在分發故在上谷爲涿那水山
川阻隔並無沿注之理所在受名者皆是經隱顯
相關遙情受用事或近矣而非所安也道元北人
叙次詳悉其言涿水亦自以地理潛顯難以究昭
蓋涿水阪泉蚩尤泉俱已不可考姑取其近似者
官之諸書所記但存古水舊名亦傳疑書疑可耳

禪堂溝在保安州西二十里長疇堡

棗溝在保安州城東北十五里

二郎溝在保安州東南八十里亦出礮山下東北流
入桑乾河今無

謹案保安州志尚有八里溝百姓溝泉子溝戴家
溝并溝村穆家溝青陽溝香溝營窠溝孫家溝安
家溝翟家溝草溝村馬槽溝陶王溝

殷繁水今無考

明史地理志懷來衛北有螺山或云卽釜山也東南有榆林堡又有殷繁水 方輿紀要殷繁舊在衛北今湮

謹案懷來縣志黑山口螺山內有細水流山流三里卽伏伏三里又流流百餘步又伏不見豈卽殷繁故迹歟

牛川今無考

畿輔通志牛心川在萬全左衛東南四十里

謹案水經注清沔水又西會牧牛山山下有九十
九泉北史帝紀魏泰常元年秋七月大獵於牛川
登釜山臨殷繁水南觀於九十九泉是牛川與釜
山相近蓋在保安之東南延慶之西北今不可考
矣

鷹窠泉

明史地理志長安嶺西北有鷹窠泉 畿輔通志
在龍門縣東南長安堡西北三里引流入堡中滙

而爲池可給居人

玉液泉

方輿紀要在延慶州城西南元時取以造酒因名
其水四流入清水河

白馬泉

方輿紀要在延慶州北三里其深莫測旁爲白馬
村

瀑布泉

宣化鎮志在延慶州北擎笏山

單家泉

延慶州志在永寧西二十里百老屯前

黑漢嶺泉在延慶州永寧城四十五里西流入周四溝堡乾河

謹案黑漢嶺在永寧極東而延慶州志云黑漢嶺堡在州西八十里泉在州城北五里河前自相矛盾又州城北亦無五里河之名

湧泉

懷來縣志在城東響間二里許百泉湧出有聲池
北又有古方井極深今涸

白龍潭

畿輔通志在延慶州東永寧城東南四十里 保
安州志在保安新城東北四十里潭口石骨生成
水深不可測有白龍出沒其中 懷來縣志在城

西北二十里

玉石溝在懷來縣保安州衙東北二十五里

瓦窯溝在懷來縣溝有塔上鐫統和六年字

廟兒港在懷來縣城南三十里

蓮花池在懷來縣西五里

保安州志在保安州城東南三里許相傳遼蕭后

植蓮之所

桓公泉

謹案水經注清沔水又西南得桓公泉水源出沮

陽縣東而西北流入清穹水一統志在懷來縣南
或以爲卽鏡泉在懷來縣南七里

柳林水出顏老山

方輿紀要顏老山在順天府西北百九十里山之
西南有石青洞東北有柳林水

清水泉出小龍口山

二統志小龍口山在府西北百九十里山有兩崖
東崖有詩白口社西崖有清水社有泉東人盧溝

河

合抱湖出宛平縣十八盤山

長安客話出百望西北六十里有陁曰十八盤有湯泉云是遼后遊處有湖焉小而深有碧鴛之巖團結不見春夏之交山水增流則湖益清可鑒是曰合抱湖

鳳凰山泉

王嘉謨薊邱集鎮邊城東曰六華之巖有巖曰得

勝又曰鳳凰山下出泉流二十里達於渾河

清水河小溪在順天府西北

名勝志盧溝河在順天府南四十里西百里有清水河流逕大臺村又西北百餘里有小溪流逕青口村俱入之

分水嶺水在順天府西四十五里山澗諸水至此分而爲二一入盧溝一入房山縣界

謹案入盧溝者清泉水也入房山縣界者廣寧鹽

溝琉璃龍泉諸水也

黑龍潭在房山縣西北五十里

房山縣志黑龍潭發源自桑乾河其水碧黑深不可測在大安山東南世傳有黑龍居之禱雨輒應

隄防

壺流河石壩

〔蔚州志〕先有小壩既毀河無所束其流漸涸李主政舜臣築之河復如故

護城隄在蔚州北康熙五十四年知州馮敬玉築乾隆九年知州楊世昌知縣劉士申重築長二百八十八丈高一丈寬一丈五尺

辛洛塔隄在蔚州城東南乾隆三年知州李仁培請

格修築以瀦南山之水長一百五十丈高八尺底寬一丈五尺頂寬一丈

米家莊隄在蔚州城東南乾隆三年知州李仁培築長一百丈高八尺底寬一丈五尺頂寬一丈壩外挑渠築小石隄一道爲外禦

底家莊隄在蔚州城西北乾隆二十三年知州帥家相築以防乾沙河之衝長一百十二丈高五尺有奇寬一丈

下官莊石壩在蔚州城西北以防乾澗峪乾沙河之水
乾隆五年築

張家莊石壩在蔚州城南以防莎澗峪乾沙河之水
乾隆三年築

橋渡

萬固橋在西寧縣南桑乾河上地名余獻莊橋凡八
空縱三十仞橫三仞有奇明宏治五年致仕百戶金
全建

觀仙橋在西寧縣東北大王山上清虛觀北跨聖水
泉上路迎懷來縣

渡口橋在西寧縣東城東二十里今毀

武林橋在保安州東南保安衛南四十里跨桑乾河

武林二姓所建

普濟橋在保安州城西南五里明正統三年建今廢
浮橋在保安州境一在河神廟一在汪源屯一在梅
家堡

保安州志河神廟橋南關外汪源屯橋城東二里
梅家堡橋城西五里

謹案畿輔通志桑乾河浮橋在保安州境內凡六
一在城西二十五里上葫蘆堡一在城西二十里

守葫蘆堡一在城西十五里孤山林一在城西南
五里梅家堡一在南關外河神廟一在城東南二
十里百姓營

桑乾河橋在蔚州城東北一百里明正德間巡按王
時中建

官莊橋在蔚州城西十里

薄家莊橋在蔚州城西北三里壺流河上

池橋在蔚州城東北偏城河入壺沱河道也

九宮口橋在蔚州東南四十里

謹案此橋爲龍沙河所經西北流注壺流

河

以上橋梁俱在直隸境尚有永濟橋在馬邑縣西
灰河橋在馬邑縣東南河陽堡橋在山陰縣西北
渡濟橋在應州東西安橋在懷仁縣東南古定橋
在大同縣東俱在桑乾河上又興雲橋在大同縣
東門外御河上萬全河橋在右玉縣北兔毛河上
小龍門橋在大同縣東南俱不在直隸境

嬌川河石橋在延慶州城南門外高九尺寬一丈四尺長六丈五尺乾隆十七年建

遺愛橋在延慶州北門內

謹案府志州北門外有惠濟橋州西三里有王家莊橋州西十六里有長里營橋奉宣門外有來遠橋南關門外有承恩橋東門外有普濟橋州南二十里有岔道橋州北三里有三里河橋州北十五里有田宋營橋州西北十五里有獅子營橋三清

宮內有昇仙橋新建終食屯龍王廟前有龍騰橋
俗名獨石橋太山行宮前有碧霞橋

溪河橋在延慶州城南明永樂中重修

廣濟橋在延慶州南明嘉靖中建今廢

晉化府志此
疑即明統志

溪河
橋

通濟橋在延慶州西北半里沽河上舊架木覆土爲
之明嘉靖間知州馮宗龍以石修砌

善人橋在延慶州西北十五里小河屯

孤山橋在延慶州西四十里跨媯河上

板橋一名下板橋在延慶州城西北十二里今廢

香川橋在延慶州城東三里

屠家營橋在永寧城西三里營北又有小橋跨龍灣

河

鎮靜橋在懷來縣保安衛西門外明嘉靖間衛人宋
虎建

清水河橋一名通濟橋在懷來縣城南關外跨媯水

上長四十二丈高二丈四尺寬二丈五尺明正德嘉靖間重建萬曆間再建

本朝康熙四十四年修乾隆三年總督孫嘉淦重修

宣化府志萬曆四十年兵備張經世儲積銀粟將建石橋曾選兵備所思仰始興工閱五年橋成制甚宏壯

謹案通濟橋在懷來縣跨媯水上卽清夸水也宣化府志以爲清水河橋翁萬達修通濟橋記第二

古有石橋不云始自何時廢於永樂再建於正德
旋毀嘉靖中僧人慧登重建其所記庚子嘉靖十
九年也時萬達爲宣大總督橋成於戊申嘉靖二
十七年也其後復爲水所壞萬曆四十年重修閱
五年而又告成則兵備張經世胡思仲也乃賀達
聖李長庚作修橋記均未言及康熙四十一年黃
給事鼎揖直謂建橋自胡始誤矣

七里橋石橋在懷來縣城東北七里明宏治六年建

三洞橋石橋在懷來縣城南百步許跨媯川上

西關橋在懷來縣西門外明萬曆四十六年兵備道
胡思仲建

清水河橋在懷來縣城東二十里許明萬曆四十六
年兵備道胡思仲建

謹案宣化府志引宣府鎮志作通濟橋而府志與
縣志俱有清水河橋而無通濟橋疑二橋實一橋
也第考明兵備張爾基新建清水河橋記謂以軍

成之間曠者程其工力彌月而長隄峙然石橋成焉則與賀逢聖所撰通濟橋記始於萬曆壬子迄丁巳告成者異矣又云往者通濟橋成余有副墨則清水河橋與通濟自是二橋又張記作新建而縣志謂此橋年久傾塌胡公重修何耶蓋直以通濟橋誤爲清水橋也

五虎橋

葉盛水東日記今懷來城東南舊石橋遺址前元

所建甚宏壯欄楯狀刻虎形俗因名五虎橋又名
白虎橋又皇帝狀其名毀之

祠廟

河神廟萬全懷來保安州俱有之

萬全縣志在城北二里 懷來縣志保安黃崖頭

萬家窯並有廟 保安州志舊在南關外桑乾河

岸河水衝圯康熙四十二年知縣楊汝楫重建於

南關外石橋下

龍王廟在延慶州城西北隅康熙三十八年重修

金河寺

懷來縣志在新保安後所遼大安元年建西南有
古塔四座

黑龍廟在房山縣黑龍潭西南元至正間建

元歐陽元黑龍潭廟碑記畧房山之大安山山之
上有龍湫深不見底以勢度之下徹山趾世相傳
有黑龍居之至正十年歲庚寅夏五月至六月不
雨申書平章政事搠思監遣留守司都事薩里彌
寶明道洞微大師畢輔貴瀝閱雨之誠於龍明日

龍見靈異既而大雷電以雨槁苗盡起及秋五穀
得熟於是作新廟以彰神庥憑潭依山經始於十
年之秋落成於十二年之冬

青龍祠在盧師山

陳昌祚燕山叢錄唐時覺禪師以道力攝二龍於
萬壽寺中池內常見蛇形一曰大青一曰小青宋
因禱雨有應封大青應濟侯小青利澤侯 册寶
錄洪熙元年二月以久旱得雨封大青龍神爲洪

濟大青龍神小青龍神爲靈顯小青龍神春秋遣

官致祭

謹案以上祠廟俱在直隸境尚有天池祠在靜樂
縣天池側河神祠在代州雁門縣南桑乾河神廟
在駕邑縣西北十里洪濤山下皆不在直隸境

水利

滙纓泉在西寧縣東南二十里三泉堡康熙戊寅邑人李姓創鑿地高一丈二尺寬八尺旁植千柳灌田百畝後有臺水環繞之經冬不凍

西寧縣新渠乾隆八年開旋廢

謹案乾隆八年總督高斌以乘乾爲永定上流發源於山西所經州縣村墟地面可於南北兩岸各開大渠一道支引灌治稻田議北岸渠工自山西

大同縣屬之西堰頭村起至直隸西寧縣之辛其村止先行開挑俟試有成效續挑南岸奏請舉行開渠四十餘里晉省東碾頭小石莊大石莊等處頗受其益惟以北有沙河三道伏秋汛發旋被停淤迤下至西寧縣界承修之員不諳形勢以致地面高仰水不入渠勘明停修其西寧小莊農民自開小渠溉田一千餘畝今沿河村莊仿照行之又案渾水自山西大同而下兩岸開渠引以灌田

窪宜稻高宜黍穀之屬爲利溥矣元史百官志洪州有種田提舉司則地之宜田可知

本朝乾隆八年督臣高斌於西寧開渠引灌本屬惠政惜任事者違其宜轉不如農民之自計爲可久也卽如盧溝橋以上之修家莊地居山麓大半砂磧乃農人自營稻田歷今數十餘年不廢蓋務此者皆屬晉人性習於勤而無畏難故業成而卒享其利其藝稻之法布列石渠卽於砂石之上引水留

泥復於四五月河水涓細之時通水而上借以插秧水足則仍洩於本河每歲大河斷涸時有清流下注所謂稻田水是也正定平山引瀘水植稻亦用此法上而宣大間處處可引惟在賢有司實心勸導示以有徵之成效課使各自營力勿事更張斯善於興利者矣或謂桑乾之水上游何以可川下游獨多泛溢蓋上游地堅土峻堅則不畏冲潰峻則利於迅流有分潤而無停積故可引灌俗以

爲銅帮鐵底也盧溝橋以下地平土疏當其衝者
嘗多坍塌之患否則亦平流散漫而無所歸洩是
以言水利者有難辭然渾水性肥所過變斥鹵爲
膏壤昔年文霸所屬信安勝芳等村乃潞水荒鄉
自康熙戊寅改河以後湍流旁衍地肥土潤今且
畦塍相望宛如江南風景一麥抵三秋輿人誦之
海子泉在蔚州北一百二十里深不可測其大以畝
計東西灌地數十頃

鐵板在蔚州西南馬莊泉止一道金時鑄鐵板開十
空分以灌溉民咸利焉

中惠民渠

保安州志明成祖永樂年間開引桑乾上流之水
溉田自頭堡起至周官堡止計十五里

南惠民渠

保安州志明神宗萬曆三年嵇顛引桑乾河水溶
渠自丁官堡起至高廟村止計十五里名南惠民

渠

北平坡渠河南惠民渠

保安州志北平坡渠自孤山村起至隆福寺止計二十五里明萬曆八年州牧劉必紹開十年復開河南惠民渠自長順屯起至七堡止計二十里

張公渠

保安州志名張公渠自鷄鳴驛起下分爲二一至兔兒口止一至東八里止計二十餘里明萬曆三

十八年懷隆兵備道張經世鑿

胡公渠

懷來縣志明萬厯間兵備道胡思伸因水泉之利
察地分渠於雙營集賢屯上下板橋小河屯才家
營清水河養鵝池花園新舊保安諸處開田數十
萬畝水利乃興 明懷隆兵備道胡思伸新墾水
田記畧籌邊者首以開墾爲急圖受事媯川直指
見陶吳公相度地宜諭成其事乃率鄉約等遍閱

屯堡察地分渠溯源通道一因海沱泉間引至古城濬渠由雙營抵州城十里墾五千餘畝水繞郭濠一引佛峪泉濬數里抵張山營遠至集賢屯墾田千餘畝一引北山下蔡泉等水東自平洋房西接張仙營南沿田守營上下板橋及吳家營郎家莊小河屯墾田一萬四千餘畝與州接壤懷延二衛地刁家營墾田四千餘畝通渠之費皆藉軍夫萬餘凡掘民地爲渠卽給官銀償之匝月間成畦

者幾及二萬畝新任宋守雲霄借管糧杜倅齊名
各銳意民事開墾前地所未成者又畝迴三萬復
及東紅寺黑龍廟集賢屯花園屯保安新城所轄
礮山堡等處皆引水灌田計出又三萬餘畝沙磧
萑葦之與悉化爲膏腴時萬厯丙辰仲秋

惠民石洞渠

懷來縣志明天啟六年懷隆道臨晉李自古城梁
下鑿石洞十餘丈至隆福寺止計十五里名惠民

石洞勒石雞山山下

謹案畿輔通志宣化府志前明職官天啟中無臨
晉李姓官懷降兵備者據云渠自古城梁至隆福
寺止則萬曆八年保安州知州劉必紹所開之北
平坡渠也疑有譌

新興堡渠

保安州志順治初年開引河灌田又名公務渠自
汪源屯起至新興堡止計一十五里

一里爲一號每一號長一百八十丈又隄身頂寬
自一丈六七尺至二丈一二尺不等底寬自四丈
餘至六丈餘不等河身內高三四尺不等外高七
八尺至一丈二三尺不等

乾隆三十四年奏准永定河金門閘增建石龍骨補
築灰土

乾隆三十八年奏准永定河下口北隄七工至九工
一帶應加高隄工又下北口六工二十號淤灘二段

本朝康熙雍正間所開至今資以灌溉而六渠之外廣水利而分水勢者其地有三一應州之渾源河支分之而桑乾之水可減一西寧之川田堰頭二村一西寧下流之鰲魚口千家營大沙河出口等村地勢衍順原隰寬濶俱可渠引桑乾如保安川制計灌溉約可千餘頃至於扼山險以緩水勢者亦有三在宣化界者爲黑龍灣在懷來界者爲合和堡在宛平界者爲沿河口皆兩山夾峙中徑二十

五六丈桑乾全河一線東趨三經截頓蓋天成壩
開關鍵之地也至上游水道所經一望荒原雖水
不卽下亦於居民田舍毫無所損况山水暴發不
過一二日漲甫落而水亦畢洩矣

五福泉

保安州志在州西南三十里五福山四頂梁山下
其流爲龍門瀑布

謹案五福山四頂梁山俱在州西南五福山卽筆

架山俗名小五臺四頂梁山頂上有田四百畝幾
忘爲萬仞山巔龍門山下有溪源村溪水環繞有
水碾六七里

岔道泉在保安州西南四十五里岔道堡北順治十
五年湧出民引作水碾

北泉在保安州沙城堡正北二里數泉相接以資灌
溉謹案沙城堡在州東七十里
三堡州道中界懷來縣

海兒窪在保安州昔滋稻田今廢

二郎溝

畿輔通志在保安州東南八十里亦出磐山下東
北流入桑乾河居民資以灌溉

後溝泉

保安州志在州南六十里後溝村居民引水作碾
北流至董家園山田稍潤

六渠一大城渠一西洋房渠一下板橋渠一張家營
渠一常里營渠一黑龍廟渠皆明萬厯間曠隆兵備

道胡思仲知州宋雲霄建

延慶州志古城渠延長三千四百二十丈深二尺
五寸濶一丈一尺并河壩口一道買地共一畝九
分西洋房梁山張家營北山田家營郎家莊西洋
房堡延長四百九十五丈深二尺五寸濶七尺買
地五畝五分下板橋渠自西小河起至西壩口張
家泉延長三百零六丈深二尺五寸濶五尺并壩
口一道張家營渠自佛峪口起至本營東南稻田

北延長一千二百四十丈濶不等常里營渠自張
家營分水流向東南延長四里黑龍廟渠自佛峪
口西分水流向東南王家堡東延長五里

小波泉在永寧西北十里引之種稻

大水泉在永寧城東北二十五里周四溝地方引灌
園蔬

謹案延慶山重水複風氣聚藏地稱沃壤媯川自
西北環流於東西而蔡水沽水又自北而西與媯

州合可資灌溉考元史百官志龍慶州栽種提舉
司掌歲輸粟米并官員上供瓜果又有龍慶州等
處田賦提領所掌土田歲賦牧場又本紀文宗至
順三年以龍慶州之流盃園池上塏上田賜燕帖
木兒可知豐腴由來久矣第畝畝畸零水道或有
湮阻狃於習者弗克罄其利原耳

水磨

懷來縣志在本城南門外有二處皆居民引山澗

水爲之保安土木等處俱有